

Maandalizi ya Ujio wa Yesu,

Kwa maana kama ilivyokuwa siku za Nuhu, ndivyo kutakavyokuwa kuja kwake Mwana wa Adamu. Mathayo 24:37.

Nuhu aliwahubiri watu wa wakati wake kwamba Mungu atawapa miaka mia moja na ishirini ya kutubu dhambi zao na kupata kimbilio ndani ya safina, lakini walikataa neema ya mwaliko huu. Walipewa muda mrefu ili wageuke na kuziacha dhambi zao, kuzishinda tabia zao mbaya na kujenga tabia za haki. Lakini mwelekeo wa dhambi, japo kwa wengi ulikuwa dhaifu mwanzoni, uliendelea kuimarika kupitia uendekezaji uliojirudia rudia na kuwapeleka kwa haraka katika uangamivu usioepukika. Onyo la rehema la Mungu lilikataliwa kwa dharau, dhahaka na kejeli; na waliachwa gizani kufuata njia ambayo mioyo yao miovu ilikuwa imechagua. Lakini kutokuamini kwao hakukuzuia tukio lililotabiriwa. Tukio lilitukia, na ghadhabu kuu ya Mungu ilionekana katika uharibifu mkuu.

Maneno haya ya Kristo yanapaswa kuzama katika mioyo ya wote wanaoamini ukweli wa sasa: “Basi, jiangalieni, mioyo yenu isije ikalemewa na urafi, na ulevi, na masumbufu ya maisha haya; siku ile ikawajia ghafula.” Hatari yetu inawasilishwa mbele yetu na Kristo mwenyewe. Alijua hatari tutakayoipitia katika siku za mwisho na anatutaka sisi tujiandae na hatari hizo...

Kuamini katika ujio ulio karibu wa Mwana wa Adamu mawinguni hautamfanya Mkristo wa kweli kuwa mzembe na kutojishughulisha na maisha ya kila siku. Wanaongojea na kutazamia ujio wa Kristo hivi karibuni hawatakaa bila kufanya kazi bali wanaofanya kazi kwa bidii. Kazi zao hazitafanywa ovyoovyo bila uaminifu, bali kwa usahihi, haraka na kwa bidii. Wale wanaojidanganya kwamba uzembe na kutokuwa makini katika mambo ya maisha haya ni ushahidi wa hali yao bora ya kiroho na ushahidi wa kujitenga kwao na ulimwengu wako chini ya udanganyifu mkuu. Ukweli wao, uaminifu na msimamo wao unajaribiwa na kuthibitishwa katika mambo ya dunia hii. Ikiwa ni waaminifu katika hayo yaliyo madogo wataweza kuwa waaminifu katika mengi.

Nimeoneshwa kwamba hapa ndipo wengi watashindwa kustahimili jaribu. Wanajenga tabia yao ya kweli katika kutawala mambo ya dunia hii. Wanadhihirisha kutokuwa waaminifu, wenye hila na wadanganyifu katika kushughulika na wanadamu wenzao. Hawafikirii kwamba mafanikio kwa ajili ya maisha ya kutokufa ya wakati ujao, yanategemea mwenendo wao katika kujishughulisha na maisha haya, uadilifu halisi ni msingi wa kutengeneza tabia ya haki.

(Testimonies for the Church 4:308-310).

Wale wanaoamini ukweli sasa wanapaswa kuonesha imani yao katika matendo. Wanatakiwa kutakaswa na kweli ambayo wanakiri kuamini, kwa maana wao ni kiashiria cha maisha katika uhai au cha kifo katika mauti

(Testimonies for the Church 4:308).